



## 米粉湯

查某囝佢查埔朋友一禮拜上無去食一擺米粉湯。難得少年的咧談戀愛，無綴時行去食牛排、食豐沛。查某囝佢這個下港來的少年兄，行無佬久就發現伊愛食米粉，歡歡喜喜共我講：「阿母，伊佢你全款愛食米粉。你毋是講愛食米粉的人，想法較單純，是非分明，湯是湯，粒是粒。」因為有米粉湯掛保證，有影丈姆看囝婿，愈看愈可愛。哪會按呢？我竟然用米粉來決定查某囝的未來。

因為米粉有食食的記持，到今離開故鄉高雄三十外冬，我若看著搵仔米粉抑是米粉炒就擋袂牢，一定愛來一碗，鄉愁才有通消啟。昨昏下班食暗的時間，順繼去新店舊街仔的電器行買溫瓶。看著對面的點心擔，人客滿滿滿，好玄問頭家：「彼擔上好食的是啥？」伊講是油飯配豬血湯。已經賣五十冬矣，這馬是第三代咧賣。閣叫我愛去啖糝一下，油飯嘛是正港的古早味。我喙應好，毋過，一下行到位看著米粉炒，我就隨變卦。我對米粉的愛，真正是「缺喙的食米粉——看現現」。

小學五年開始讀規工，因為中晝佇外口食，阿母有當時仔會予我十箍。我上捷食的，就是米粉炒配清湯灌甲飽。炊甲熗煙的米粉、濟濟的豆菜、兩枝仔韭菜、淋溼溼的肉燥湯，才敲敲沂予欲焦毋焦。排列等頭家攢的時，攏嘛強欲流喙瀾。一手交錢、一手交貨了後，肉燥的芳味、滿意的口味，十歲囝仔獨立的開始，變做是我上孃的記持。這就是我看著米粉無食一碗袂使的證據。

炒的、湯的攏好食。我這馬誠愛食搵仔米粉，因為伊共米粉炒濫清湯，一兼二顧。毋過若欲買請我，愛細膩喔，毋是北部煮規坵、有豆腐糰、粗枝的、焿甲走味去的彼款。我的米粉湯足厲害，無論是都市抑是庄跤所在，攏有地食閣有變化：去到金門是蚵仔米粉；到宜蘭濫芋仔、魚仔；到新竹就有貢丸。毋管按怎料理，就是袂糊去，湯攏是清清氣氣。

米粉閣有較厲害的喔！佇臺灣有誠濟食物攏是用日語號名，像『a-geh』（華語『阿給』）、『thian-pu-lah』（華語『甜不辣』），毋過日語的「ビーフン」卻是對閩南語「米粉」來的。

若有一工，阮查某囝的所愛變做我的囝婿，希望伊嘛會像米粉遐厲害、遐可愛！

作者：王秀容

### ☆詞彙學習☆

【消啟】siau-tháu：（情緒得以）發洩。

【沂】kîn：用餐具擋住食材，倒出湯汁。

【好玄】hònn-hiân：好奇。

【坵】khann：鍋子、烹煮食物的鍋具。

【啖糝】tām-sám：解饞、淺嚐。

【焿】kûn：將食物放在水裡長時間熬煮。

### ☆文法學習☆

【有地(ū-tè)……】後接動詞，表示有地方可以，或能夠……。例如「有地買」（有地方可以買得到）、本文中的「有地食」（有地方可以吃）、「有地講」（有傾吐的對象）等。另外，也有「無地(bô-tè)……」的用法，例如「無地睏」（沒地方睡）、「無地看」（看不到）等。